



Sumáriu Kazu
Tribunál Distritál Baukau
Juñu 2022

Afirmasaun: Sumáriu Kazu tuir mai ne'e deskreve faktu sira no prosesu iha Tribunál tuir JSMP nia monitorizasaun independente, no deklarasaun ne'ebé parte sira fó iha Tribunál nia laran. Informasaun ne'e la reprezenta JSMP nia hanoin hanesan instituisaun ida.

JSMP kondena maka'as forma violénsia hotu-hotu, liuliu hasoru fetu no ema vulneravel. JSMP afirma la iha justifikasaun ba kualkér violénsia hasoru fetu.

A. Sumáriu prosesu julgamentu kazu iha Tribunál Distritál Baukau

1. Totál kazu ne'ebé JSMP monitoriza: 26

Artigu	Tipu Kazu	Númeru
Artigu 145 Kódigu Penál (KP) & artigu 2, 3, no 35 letra (b) Lei Kontra Violénsia Doméstika (LKVD)	Ofensa ba integridade física simples ho natureza violénsia doméstika (artigu 2 kona-ba konseitu violénsia doméstika, artigu 3 kona-ba relasaun família, artigu 35 kona-ba tipu krime Violénsia Doméstika (VD) sira no artigu 36 kona-ba krime sira violénsia doméstika nian hanesan krime públiku)	9
Artigu 154 KP & artigu 2, 3, no 35 letra (a) LKVD	Maus-tratus ba kónjuje	3
Artigu 20 (1) Lei Arma Brankas	Arma Brankas	1
Artigu 145 KP	Ofensa ba integridade física simples	4
Artigu 244 (1 ali a) KP	Des-obidiénsia	1
Artigu 258 KP	Danu simples	1
Artigu 171 KP no 145 KP	Koasaun seksuál no ofensa integridade física simples	1
Artigu 178 KP	Aktu seksuál ho adolexente	1
Artigu 148 (2) KP no	Ofensa ba integridade física negligente no	1

artigu 207 KP	kondusaun sein karta	
Artigu 139 KP no artigu 20 (1) Lei Arma Brankas	Omísidiu agravadu no arma brankas	1
Artigu 177 KP no artigu 182 KP	Abuzu seksuál ba menór ho agravausaun	1
Artigu 145 KP no artigu 258 KP	Ofensa ba integridade fizika simples no danu simples	1
Artigu 157 KP	Ameasa	1
Totál		26

2. Totál desizaun ne'ebé JSMP monitoriza: 22

Tipu desizaun	Artigu	Númeru
Pena prizaun	Artigu 66	2
Suspensaun ba prizaun nia ezekusaun	Artigu 68 KP	8
Pena multa	Artigu 67 KP	6
Pena multa no omologa	Artigu 67 KP no 216 KP	1
Pena admoestasaun		1
Omologa		4
Totál		22

3. Totál kazu sira ne'ebé adia tuir JSMP nia monitorizasaun: 0

4. Totál kazu ne'ebé sei kontinua prosesu tuir JSMP nia monitorizasaun:4

B. Deskrisaun sumáriu julgamentu ba desizaun kazu sira

1. Krime maus-tratu kónjuje

Nú. Prosesu : 0039/21.BCBCV
 Kompozisaun Tribunál : Koletivu
 Juis : Dra.Sribuana da Costa no Dr. José António d. Escurial no
 Dra. Jumiaty Maria Freitas
 Prokuradór : Dr. João Marques
 Defeza : Dr. Grigório Maria Lourdes de Lima
 Desizaun : Pena prizaun tinan 2 suspende ba tinan 3

Iha 01 Juñu 2022, Tribunál Distritál Baucau prezide julgamentu leitura akordaun ba krime maus-tratus ba kónjuje ne'ebé envolve arguidu JX hasoru nia feen, iha Munisípiu Baukau

Akuzasaun Prokuradór

Prokuradór akuza katak iha 10 Maiu 2021 iha oras tuku 24:00 kalanarguidu tebe dala rua iha lezada nia kotuk laran. Tuir mai iha 11 Maiu 2021 iha oras tuku 09:00 dadeer arguidu tebe dala rua iha lezada nia kidan parte kotuk no bainhira lezada tanis halai arguidu kontinua duni no tebe dala tolu iha lezada nia kotuk laran, tuku dala rua iha lezada nia tilun parte loos kauza ran no desmaia. Antes ne'e arguidu ho lezada diskute malu tanba deit lezada foti arguidu nia osan US\$5.00 iha arguidu nia bolsu, arguidu nerbozu halo agresan hasoru lezada. Aldende ne'e arguidu atu uza motor ba nia feen primeiru maibé motor lamoris no arguidu diskunfia lezada mak tesi kotu fiu motor, arguidu nerbozu no halo agresan refere hasoru lezada.

Prokuradór akuza arguidu kontra artigu 154 KP kona-ba maus-tratus ba kónjuje ho moldura penál tinan 2 to'o tinan 6 konjuga ho artigu 2, 3(a), 35(a) no 36 LKVD.

Produsaun ba prova sira

Iha prosesu julgamentu, arguidu deklara katak akontese iha 10 Maiu 2021 ne'e loos hotu ho motivu lezada lees arguidu nia faru. Akontese iha 11 Maiu 2021 ne'e arguidu basa dala ida iha lezada nia tilun hun, tebe dala ida iha kidan, di'ak malu ona, arrepende ninia hahalok, foin primeiravés mai hatan iha tribunál no ba futuro sei la repete tan ninia hahalok.

Alende ne'e, lezada lezada kontinua konfirma faktu hotu iha akuzasaun, depoisde akontese sira di'ak malu kedas no to'o agora la baku ona lezada.

Alegasaun finál

Prokuradór haktuir katak arguidu nia konduta ne'e priense duni krime ne'ebe imputa ba nia tanba arguidu halo tratamentu kruel hasoru lezada mezmu sira di'ak malu, asegura arguidu nia konduta iha futuro atu labele hatoman-an uza krime hasoru lezada. Tanba ne'e husu ba tribunál atu kondena arguidu ho pena prizaun tinan tolu suspende ba tinan tolu.

Enkuantu defeza haktuir katak, arguidu konfesa faktu sira, depoisde akontese sira di'ak malu fali, arrepende ninia hahalok, foin primeiravés mai hatan iha tribunál. Tanba ne'e husu ba tribunál atu aplika pena ne'ebé adekua ba arguidu.

Desizaun

Depoisde avalia faktu hotu, tribunál prova katak iha 10 Maiu 2021 iha oras tuku 24:00 kalan arguidu tebe dala rua iha lezada nia kotuk laran. Iha 11 Maiu 2021 iha oras tuku 09:00 dadeer arguidu tebe dala rua iha lezada nia kidan parte kotuk no bainhira lezada tanis, arguidu kontinua duni lezada no tebe dala tolu iha lezada nia kotuk laran, tuku dala rua iha tilun hun parte loos. Bazeia ba faktu provadu sira ne'e no tetu mós sirkunstánsia atenuante sira hanesan arguidu konfesa, arrepende ninia hahalok, foin primeiravés mai hatan iha tribunál. Nune'e tribunál konklui prosesu ne'e no kondena arguidu ho pena prizaun tinan rua suspende ba tinan tolu.

2. Krime arma brankas

Nú. Prosesu	: 0006/22.BCSIC
Kompozisaun Tribunál	: Koletivu
Juis	: Dra.Sribuana da Costa, Florencia Freitas no Dr. José António d. Escurial
Prokuradór	: Dr. Bartolomeu de Araújo
Defeza	: Dr. Americo da C. Freitas (advogado CJP)
Desizaun	: Pena prizaun tinan 3 suspende ba tinan 4

Iha 01 Juñu 2022, Tribunál Distritál Baukau prezide julgamentu leitura akordaun ba krime arma brankas ne'ebé envolve arguidu Juvinal Freitas Belo hasoru Estadu RDTL, iha suku Tirilolo postu administrativu Baukau vila Munisípiu Baukau.

Akuzasaun Prokuradór

Prokuradór akuza katak iha 05 Janeiro 2022, orasu tuku 11:40 meiodia, iha tempu ne'eba testemuña fase hela nia oan nia nerás, derrepente arguidu ba aperta nia kakorok halo moras, tuku iha testa seguidas la sura, depois insulta ho palavras, ho tauk no trauma lezadu halai ba halo keixa iha komando PNTL Baukau no lori kedas ba halo tratamentu mediku iha HOREX hafoin fila kedas mai uma, wainhira fila mai uma lezadu aruma nia roupa atu ba Vikeke, testemuña tuur hela ho testemuña João Francisco A. Pinto haree arguidu lori tudik ida sikat iha nia kanotak hodi duni tuir lezadu no lezadu mós, hamri'ik hein de'it ona arguidu no arguidu to'o halo agresaun hasoru lezadu.

Prokuradór akuza arguidu kontra artigu 145 KP kona-ba ofensa ba integridade física simples ho moldura penál to'o tinan 3 ka multa no kontra artigu 20 (1) husi lei Arma Barnkas ho moldura penál tinan 3 to'o tinan 6.

Produsaun ba prova sira

Iha prosesu julgamentu, arguidu deklara katak antes ne'e sira problema duni maibé ba rezolve ona iha Polisia ho nia solusaun lezadu ba hela iha nia bin sira maibé lezadu nafatin ba iha arguidu nia uma nune'e provoka arguidu nerbozu hakat hasoru lezadu no hetan tudik iha vazú ai-funan no foti tudik konsegue hadau malu rezulta lezadu nia liman kanek no arguidu mós liman kanek, arguidu deklara tan katak nia la sikat tudik iha nia knotak, di'ak malu ona, foin primeiravés mai hatan iha tribunál, arrepende ninia hahalok.

Alende ne'e Testemuña mós deklara katak iha momentu ne'eba akontese duni problema, kona-ba kazu ofensa simples sira dame malu ona lezadu mós konkorda deziste nia keixa tanba sira iha relasaun família arguidu hanesan testemuña nia rian rasik.

Alegasaun finál

Prokuradór haktuir katak arguidu provadu komete krime arma brankas no arguidu lori duni tudik wainhira konfirma ho testemuña, tudik ne'e arguidu sikat iha knotaknune'e, husu ba tribunál kondena arguidu ho pena prizaun tinan tolu fulan neen.

Defeza akresenta katak arguidu konfesa faktu balun no problema ne'e akontese hetan provokasaun husi lezadu tanba antes ne'e sira iha ona problema no polisia dehan ba lezadu ba hela iha nia feton sira maibé lezadu kontinua ba iha arguidu nia uma, arguidu arrepende ninia hahalok, foin primeiravés mai hatan iha tribunál. Tanba ne'e husu ba tribunál aplika pena admoestasaun ba arguidu.

Desizaun

Depoisde avalia faktu sira hotu, tribunál prova arguidu uza tudik sona testemuña. Bazeia ba faktu provadu sira ne'e no tetu mós sirkunstánsia atenuante sira hanesan arguidu konfesa, arrepende ninia hahalok, foin primeiravés mai hatan iha tribunál. Nune'e tribunál konklui prosesu ne'e no kondena arguidu ho pena prizaun tinan tolu suspende ba tinan haat

3. Krime ofensa ba integridade fizika simples

Númeru prosesu	: 0053/18. BCBCV
Kompozisaun tribunal	: Singulár
Juís	: Dra. Sribuan da Costa
Prokuradór	: Dr. Ambrosio Rangel Freitas
Defeza	: Dr. Sidonio Maria Sarmiento
Desizaun	: Omologa dezistencia keisa

Iha 01 Juñu 2022, Tribunál Distritál Baukau prezide Julgamentu tentativa konsiliaun no omologa ba krime ofensa ba integridade fizika simples ne'ebé envolve arguidu Zeovanio da Costa Sarmiento hasoru lezadu Lucas Perdom Ximenes, iha aldeia Samalakuliba suku Buibau Postu Administrativu Baukau Vila Munispiu Baukau.

Akuzasaun prokuradór

Prokuradór akuza katak iha 22 Marsu 2018 iha oras tuku 01:00 kalan iha Vila Nova Baukau arguidu uza fatuk tuku dala ida iha lezadu nia tilun hun parte karuk, tuku dala ida ho fatuk iha hirus matan, arguidu kaer metin lezadu nian faru rasta to'o iha olio pezadu besik arguidu nia uma hafoin tebe taan dala ida iha lezadu nia kotuk laran bainhira husik tiha lezadu, arguidu hodi fatuk tuda tan lezadu nia ain fuan ki'ik dala ida. Antes ne'e arguidu deskonfia lezadu foti nia karteira.

Prokurador akuza arguidu kontra artigu 145 KP kona-ba ofensa ba integridade fizika simples ho moldura penál to'o tinan 3 ka multa no 258 KP kona-ba danu simples ho moldura penál to'o tinan 3 ka multa.

Prosesu tetantiva konsiliaun

Baziea ba artigu 262 KPP antes tama ba iha produsaun ba prova tribunál halo tentativa konsiliaun ba krime sira ho natureza semi públiku. Iha prosesu tentativa konsiliaun ne'e lezadu hakarak deziste ninia keixa hasoru arguidu sira tanba arguidu ho lezadu sira mesak família deit,ho kondisaun arguidu sira fó osan US\$200.00 hodi lezadu halo tratamentu nia kanek no husu deskulpa ba lezadu. Arguidu sira arrepende ba sira nia hahalok no lezadu konkorda no hakarak deziste nia keixa hasoru arguidu.

Alegasaun final

Prokuradór haktuir katak iha tentativa konsiliaun ne'e lezadu perdua ona arguidu tanba husu ona deskulpa ho kondisaun arguidu fó osan US\$200.00 ba lezada hodi halo tratamentu no lezada dezite nia keixa hasoru arguidu. Nune'e husu ba tribunál omologa dezistencia keixa refere.

Entretantu, defeza haktuir katak perante tribunál arguidu arrepende ba nian hahalok no husu ona deskulpa ba lezadu nu'udar família. Nune'e husu ba tribunál omologa dezistencia keixa no absolve arguidu husi prosesu ne'e.

Desizaun

Depoizde tentativa konsiliaun tuir artigu 261 KPP lezada deziste ona nia keixa hasoru arguidu ho kondisaun hanesan husu deskulpa. Nune'e tribunál hasai ninia despaixu hodi omologa dezistencia keixa no absolve arguidu husi prosesu.

4. Ofensa ba integridade fisica simples ho natureza violencia domestika

Nú. Prosesu	: NUC. 0001/22.BCQLC
Kompozisaun Tribunál	: Singulár
Juis	: Dra. Florencia Freitas
Prokuradór	: Dr. Julio da Silva Correia
Defeza	: Dr. Sidonio Maria Sarmentu
Desizaun	: Pena multa

Iha 07 Juñu 2022, Tribunál Distritál Baukau prezide julgamentu leitura sentensa ba krime ofensa ba integridade física simples ho natureza violénsia doméstika ne'ebé envolve arguidu VC hasoru nia feen, iha Munisípiu Baukau

Akuzasaun Prokuradór

Iha lora 11 Janeiru 2022 iha oras tuku 08:00 dae mosu diskusaun kona-ba arguidu deskonfia lezada *amante* ho mane seluk, arguidu nerbozu tuku keda dala rua iha lezada nia ren-toos no inus.

Prokuradór akuza arguidu kontra artigu 145 KP kona-ba ofensa ba integridade física simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu deklara katak nia deskonfia lezada, tanba ne'e mak arguidu hirus tuku dala rua iha lezada nia ren-toos no inus. depoizde akontese to'o

agora sidauk di'ak malu, foin primeiravés mai hatan iha tribunál no promete sei la komete tan krime seluk iha futuru. Arguidu nu'udar agrikultór rezultadu hodi sustenta de'it ba família.

Alende ne'e, lezada deklara katak arguidu deskonfia lezada no sira diskute malu, derepente arguidu tuku deit dala rua iha lezada nia ren-toos no inus, di'ak malu ona, arguidu husu ona deskulpa ba lezada, to'o agora arguidu la baku ona lezada.

Alegasaun finál

Prokuradór haktuir katak arguidu nia aktu ne'e priense duni artigu 145 KP kona-ba krime ofensa integridade fizika simple no lei kontra violénsia doméstika, iha produsaun prova arguidu konfesa faktu no lezada konfirma faktu iha akuzasaun no arguidu nia deklarasaun. Tanba ne'e husu ba tribunál atu kondena arguidu ho pena prizaun tinan ida suspende ba tinan ida.

Entretantu defeza akresenta katak depoisde produsaun prova arguidu konfesa faktu hotu, di'ak malu ona, arrepende ninia hahalok foin primiravés mai hatan iha tribunál. Tanba ne'e husu ba tribunal aplik apena kmaan ba arguidu.

Desizaun

Depoisde avalia faktu hotu, tribunál prova arguidu tuku dala rua iha lezada nia ren-toos no inus. Bazeia ba faktu provadu sira ne'e no tetu mós sirkunstánsia atenuante sira hanesan arguidu konfesa, arrepende ninia hahalok, foin primeiravés mai hatan iha tribunál no di'ak malu ona ho lezada, nune'e tribunál konklui prosesu ne'e no kondena arguidu ho pena multa US\$60.00 ne'ebé arguidu sei selu sentavus 0,50 kada loron durante loron 120. Tribunál mós fiksa pena alternativa durante loron 80 prizaun, bainhira arguidu la kumpri pena multa refere.

5. Krime ofensa ba integridade fízika simples ho natureza violénsia doméstika

Nú. Prosesu	: 0010/22. BCSIC
Kompozisaun Tribunál	: Singulár
Juis	: Dra. Florencia Freitas
Prokuradór	: Dr. Julio da Silva Correia
Defeza	: Dr. Sidonio Maria sarmento
Desizaun	: Pena multa

Iha 07 Juñu 2022, Tribunál Distritál Baukau prezide Julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu PJLP hasoru nia feen, iha Munisípiu Baukau.

Akuzasaun Prokuradór

Prokuradór akuza katak iha 15 Fevereiru 2022 iha oras tuku 10:20 dadeer arguidu uza ai sanak baku dala ida iha lezada nia liman parte karuk, foti bé manas fakar iha lezada nia isin kona lezada nia vistidu o liman parte karuk. Antes ne'e lezada haruka sira nia oan tolok arguidu, nune'e arguidu nerbosu no halo agresauun refere hasoru lezada.

Prokuradór akuza arguidu kontra artigu 145 KP kona-ba ofensa ba integridade fízika simples ho nia moldura penál to'o tinan 3 ka multa konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu deklara katak antes ne'e arguidu serbisu iha Vikeke depois lezada telefone ba arguidu no ko'alia no iha telefone laran arguidu rona lezada haruka oan tolok arguidu ne'e mak arguidu hirus fila husi Vikeke mai to'o uma diskute malu ho lezada, arguidu foti ai sanak baku dala ida iha lezada nia liman parte karuk no foti bee iha ahi leten fakar ba iha lezada nia isin, maibé bee la manas. depoisde akontese di'ak malu kedas no kontinua moris hamutuk nu'udar feen ho la'en, arrepende nia hahalok, foin primeiravés mai hatan iha tribunál, arguidu serbisu nu'udar agrikultór rezultadu hodi sustenta de'it ba família.

Entretantu lezada konfirma faktu hotu lezada ba halo tratamentu iha Pradet no depoisde fila husi tratamentu sira di'ak malu fali no to'o agora arguidu la baku ona lezada.

Alegasaun finál

Prokuradór haktuir katak iha audénsia julgamentu arguidu konfesa lezada konfirma faktu hotu iha akuzasaun, bazeia ba lezada nia deklarasaun sira ne'e katak krime agresaun ne'e ejiste, nune'e husu ba tribunál atu kondena arguidu ho pena prizaun tinan ida suspende ba tinan ida.

Enkuantu defeza haktuir katak bazeia ba produsaun prova sira ne'ebé produs iha audénsia julgemntu henesan, arguidu konfesa, di'ak malu ona, depoisde akontese la baku ona lezada no sira hamutuk halo serbisu hodi sustenta sira nia família ho razaun hirak ne'e husu ba tribunál aplika pena kmaan ba arguidu.

Desizaun

Depoisde avalia faktu hotu, tribunál prova arguidu uza ai sanak baku dala ida iha lezada nia liman parte karuk, foti bé manas ne'ebé hatur iha leten hodi fakar iha lezada nia isin kona iha lezada nia vistidu no liman parte karuk. Bazeia ba faktu provadu sira ne'e no tetu mós sirkunstánsia atenuante sira hanesan arguidu konfesa, arrepende ninia hahalok, foin primeiravés mai hatan iha tribunál no di'ak malu ona ho lezada, nune'e tribunál konklui prosesu ne'e no kondena arguidu ho pena multa US\$45.00 ne'ebé arguidu sei selu sentavus 0,50 kada lora durante lora 90. Tribunál mós fiksa pena alternativa durante lora 60 prizaun, bainhira arguidu la kumpri pena multa refere.

6. Krime maus-tratus ba kónjuje

Nú. Prosesu : 0038/17.PDBAU
Kompozisaun Tribunál : Koletivu

Juis : Dra.Florencia Freitas, Dra. Sribuana da Costa no Dr. José António d. Escurial
Prokuradór : Dr. Julio da Silva Marques
Defeza : Dr. Grigório Maria Lourdes de Lima
Desizaun : Pena prizaun tinan 2 suspende ba tinan 2

Iha 15 Juñu 2022, Tribunál Distritál Baukau prezide julgamentu leitura akordaun ba krime maus-tratus ba kónjuje ne'ebé envolve arguidu FS hasoru nia feen, iha Munisípiu Vikeke

Akuzasaun Prokuradór

Prokuradór akuza katak iha 09 Juñu 2015 iha oras tuku 22:00 kalan ho família sira Jantar hamutuk iha sira nia rezidencia, altura ne'e lezada han sidauk hotu, derepente arguidu basa dala rua iha lezada nia kanuruk, lori akar-kelen baku dala hat iha lezada nia ain kabun parte loos, tuku dala barak iha lezada nia kotuk laran, rezulta lezada monu ba rai no rezulta ran sai husi lezada nia ibun no tilun, wainhira lezada konxiente arguidu kontinua duni lezada sai husi sira nia rezidencia iha momentu kalan ne'e lezada ho nia dexedentes sira ne'ebé maka sei menoridade ba toba de'it iha ai-hun iha área mota beloi to'o oras 12:00 kalan bo'ot maibé tanba sira nia dexedentes sente malirin nune'e lezada ho nia dexedente ba de'it iha sira nia rezidencia, iha dadeer arguidu haree lezada ho nia dexedentes sira sei nafatin iha sira nia rezidencia mesmu akontinua duni lezada maibé lezada rejeita.

Iha 11 Juñu 2015 arguidu lori kedas lezada ho nia oan ba iha lezada nia inan aman iha Manleuana Komoro-Dili. Arguidu kuandu hemu tua lanu sempre halo agresaun hasoru lezada.

Prokuradór akuza arguidu kontra artigu 154 KP kona-ba mau-stratus ba kónjuje ho moldura penál tinan 2 to'o tinan 6, konjuga ho artigu 2, 3, 35 LKVD.

Produsaun ba prova sira

Iha prosesu julgamentu, arguidu deklara katak fila husi serbisu haruka lezada fó nia hahan (etu) ba arguido hodi han maibé lezada rejeita nune'e arguido ho lezada diskute malu, arguidu nerbozu tuku dala rua iha kanuruk maibé faktu seluk arguidu la hatene. Arguidu kondisaun lanu sempre histori malu ho lezada la'os baku lezada. Durante moris hamutuk foin primeiravés baku lezada, arguidu ho familia tenta lezada ho nia familia maibé lezada mak diside moris separa ona ho arguidu.

Lezada mós haktuir tan iha 09 Junu 2015 iha oras tuku 22:00 kalan arguidu ho kondisaun lanu emidiata tuku dala ida iha lezada nia kanuruk lezada monu ba rai, lori akar kelen baku iha lezada nia kelen, tuku iha tilu hun parte karuk rejulta ran, lezada ba hospital no simu aimoruk fila kedas, lezada deklara tan kata baibain arguidu ho kondisaun lanu sempre halo violénsia hasoru lezada no lezada la ba hato'o keixa.

Alegasaun finál

Prokuradór haktuir katak arguidu konfesa parsialmente maibé lezada deklara katak iha 09 Juñu 2015 arguidu halo agresaun krúel hasoru lezada, wainhira arguidu ho kondisaun lanu sempre halo agresaun hasoru lezada. Arguidu nia hahalok ne'e prinse rekejitus artigu 154 KP kona-ba maus-tratsu ba kónjuje no lei LKVD. Ho akontesementu ne'e lezada diside moris separa ho arguidu ne'e tanbá lezada durante ne'e moris la konfrotavel ho arguidu. Tanba ne'e husu atu kondena arguido ho pena prizaun tinan rua suspende ba tinan rua.

Enkuantu parte defeza haree katak arguidu rejeita faktu balun no arguidu deklara katak nia baku dala rua iha kanuruk, arguido konfesa, foin pprimeiravés mai hatan iha tribunál antes ne'e laiha antesdentes kriminal, nune'e husu ba tribunál atu fó pena ne'ebé maiz adekuadu.

Desizaun

Depoisde avalia faktu hotu, tribunál prova arguidu halo duni agresaun hasoru lezada, arguidu tuku dala ida iha lezada nia kanuruk lezada monu ba rai, lori akar kelen baku iha lezada nia kelen, tuku iha tilun hun parte karuk rezulta ran. iha 11 Junu 2015 arguidu entrega lezada ho nia oan ba nia inan aman, durante moris hamutuk bainhira arguidu kondisaun lanu sempre baku lezada. Bazeia ba faktu provadu sira ne'e no tetu mós sirkunstánsia atenuante sira hanesan arguidu konfesa, arrepende ninia hahalok, foin primeiravés mai hatan iha tribunál. Nune'e tribunál konklui prosesu ne'e no kondena arguidu ho pena prizaun tinan rua suspende ba tinan rua.

7. Krime des-obidensia

Nú. Prosesu	: 0047/21. PDBAU
Kompozisaun Tribunál	: Singulár
Juis	: Dra. Sribuana da Costa
Prokuradór	: Dr. Bartolomeu de Araújo
Defeza	: Grigório Maria Lourdes de Lima
Desizaun	: Pena admoestasaun

Iha 15 Juñu 2022, Tribunál Distritál Baukau prezide julgamentu leitura sentensa ba krime des-obidensia ne'ebé envolve arguidu Ines Freitas, Virgilio de Carvalho, Maria Dias Quintas no Natlísia Dias Quintas hasoru lezadu Julio Freitas, iha aldeia Bee Moris suku Fuiluru postu administrativu Lospalos Munisípiu Lautein.

Akuzasaun Prokuradór

Prokuradór akuza katak iha 19 Novembru 2021 arguidu sira tenki fó fila fali rai ne'ebé disputa ho lezadu ho nia família sira maibé arguidu sira la simu dezisaun tribunál primeiru instasia nune'e lezadu halo rekursu ikus mai tribunál rekursu mantein dezisaun primeira instasia maibé arguidu sira nafatin la kumpri no halo nafatin to'os refere.

Prokuradór akuza arguidu kontra artigu 244 (1 alinea a) KP kona-ba des-obidensia

Produsaun ba prova sira

Iha prosesu julgamentu, arguida Ines Freitas deklara katak nia nafatin halo to'os no natar refere to'o agora.

Arguidu Virgilio de Carvalho deklara katak nia parte la kumpriende kona-ba dezisaun sira ne'e mak nia parte halo nafatin to'os no natar refere.

Arguida Maria Dias Quintas deklara katak arguida la hatene kona ba problema rai refere maibe arguida Ines Freitas mo fo rai hodi hodi kuda angriau

Arguida Natalicia Dias Quintas deklara katak arguida bai-bain serbisu nu'udar fila liman ba sosa de'it arguida Ines Freitas nia angriaun no nia la hatene kona-ba rai no arguidu mós halo to'os natar iha fatin refere.

Alende ne'e, lezadu deklara arguidu sira la kumpri dezisaun husi tribunál Baukau no dezisaun tribunal rekursu to'o agora arguidu sira kontinua utuliza to'os no natar ne'e mak lezadu apresenta keixa hasoru arguidu sira.

Alegasaun finál

Prokuradór haktuir katak arguidu sira la kumpri dezisaun tribunál distritál no tribunál rekursu nia dezisaun mezmuz dezisaun tribunál temporariu kona-ba kazu rai ho prosesu providensia kautelar. Arguidu sira provadu komete krime dezobidensia, tanba ne'e husu ba tribunál atu kondena arguidu sira ho pena prizaun fulan tolu suspende ba tinan ida.

Entretantu, defeza akresenta katak konsidera arguidu sira nia konviksaun iha prosesu julgamentu, arrepende ninia hahalok no foin primeiravés mai hatan iha tribunál, tanba ne'e husu ba tribunál aplika pena adekuadu ba arguidu.

Desizaun

Depoisde avalia faktu hotu, tribunál prova arguidu sira la kumpri dezisaun tribunál. Bazeia ba faktu provadu sira ne'e no tetu mós sirkunstánsia atenuante sira hanesan arguidu konfesa, arrepende ninia hahalok, foin primeiravés mai hatan iha tribunál. Nune'e tribunál konklui prosesu ne'e no aplika pena admoestasaun ba arguidu sira.

8. Krime danu simples

Nú. Prosesu	: 0011/20 BCQLC
Kompozisaun Tribunál	: Singulár
Juis	: Dr. José António d. Escurial, Dra. Jumiaty Maria Freitas no Dra. Sribuana da Costa
Prokuradór	: Dr. Julio da Silva Correia
Defeza	: Grigório Maria Lourdes de Lima
Desizaun	: Pena multa

Iha 15 Juñu 2022, Tribunál Distritál Baukau prezide julgamentu leitura sentensa ba krime danu simples ne'ebé envolve arguidu Mateus Soares Belo hasoru Eskola Báziku Katolika Laisorulai, aldeia Laisorulai, suku Laisorulai postu administrative Kelikai Munisípiu Baukau

Akuzasaun Prokuradór

Prokuradór akuza katak 18 Abril 2020 iha oras tuku 17:30 lokraik arguidu hamutuk ho nia kolega Ajuli hemu tua mutin iha arguidu nia uma, hemu hotu tiha arguidu ho nia kolega lori jerigen litru lima nian ba sosa tan tua mutin no la'o to'o eskola báziku Katolika Laisorolai Ajuli ba uluk sosa tua no arguidu tuur hela foti fatuk tuda rahun tiha vidru eskola nian hamutuk tahan lima. Vidru lima ne'e, kada vidru ho folin US\$2.50 ho total US\$12.50. Sasan ne'ebe arguidu tuda rahun ne'e utilizaun ba publiku.

Prokuradór akuza arguidu kontra artigu 259 KP kona-ba danu agrvadu ho moldura penal tinan 2 to'o tinan 8.

Produsaun ba prova sira

Iha prosesu julgamentu, arguidu deklar katak faktu hotu iha akuzaun ne'e loos hotu, arguidu ho kondisaun lanu depoisde akontese liu semana rua arguidu ba sosa vidru hodi troka kedas vidru ne'ebé rahun, arrepende ninia hahalok no foin primeravés mai hatan iha tribunál.

Entretantu testemuña Julio Germano da Costa nu'udar Adjuntu Diretór deklar katak momentu ne'e eskola feriadu mak arguidu tuda rahun vidru no iha 15 Agostu 2022 mak arguidu troka fali vidru refere.

Alegasaun finál

Prokuradór haktuir katak akuzasaun ne'ebé imputa ba arguidu ne'e provadu hotu bazeia ba ba arguidu no testemuña nia konfirmasaun tanba sasan ne'ebé arguidu estraga ne'e utilizaun ba publiku ho razaun hirak ne'e arguidu nia hahalok ne'e priense duni rekeztus ba krime danu agrvadu. Tanba ne'e husu ba tribunál atu kondena arguidu ho pena prizaun tinann ida suspende ba tinan ida.

Entretantu, defeza akresenta katak arguidu konfesa faktu iha kauzasaun, arrepende ninia hahalok, vidru ne'ebé rahun arguidu troka fali ona, foin primeiravés mai hatan iha tribunál. Tanba ne'e husu ba tribunal atu aplika pena maiz adekuadu ba arguidu.

Desizaun

Depoisde avalia faktu hotu, tribunál prova arguidu tuda rahun tiha vidru eskola nian hamutuk tahan lima. Arguidu ho kondisaun lanu no vidru lima ne'e kada vidru ho folin US\$2.50 ho total US\$12.50. Nune'e tribunál halo altesrasaun ba artigu 258 KP kona-ba krime danu simples.

Bazeia ba faktu provadu sira ne'e no tetu mós sirkunstánsia atenuante sira hanesan arguidu konfesa, arrepende ninia hahalok, foin primeiravés mai hatan iha tribunál no di'ak malu ona ho lezada, nune'e tribunál konklui prosesu ne'e no kondena arguidu ho pena multa US\$30.00 ne'ebé arguidu sei selu sentavus 0,50 kada loraun durante loraun 60. Tribunál mós fiksa pena alternativa durante loraun 40 prizaun, bainhira arguidu la kumpri pena multa refere.

9. Krime koasaun seksuál no ofensa ba integridade fizika simples

Nú. Prosesu : 0018/19.BCEVN
Kompozisaun Tribunál : Koletivu
Juis : Dra. Sribuana da Costa, Dra. Florencia Freitas no
Dr. José António d. Escorial
Prokuradór : Dr. Ambrosio Rangel Freitas
Defeza : Dr. Sidonio Maria Sarmiento
Desizaun : Pena únika tinan 3 suspende ba tinan 3

Iha 15 Juñu 2022, Tribunál Distritál Baukau prezide julgamentu leitura akordaun ba krime koasau seksuál no ofensa ba integridade fizika simples ne'ebé envolve arguidu DdS hasoru lezada MR, iha Munisípiu Baukau.

Akuzasaun Prokuradór

Prokuradór akuza katak, iha lora 08 Agostu 2019 iha oras tuku 08:00 dadeer lezada ba taa hudi kain no bainhira lori fila ba uma, lezada liu husi arguidu nia uma sorin, bainhira to'o iha nia uma sorin arguidu ko'alia ba lezada has fuan ne'ebá fuan boot ona, nune'e lezada hateke ba has leten arguidu aproveita rasta iha lezada nia fuuk husi kotuk no hakuak kedas lezada no liman kumu lezada nia hirus matan parte rua no lezada lori hudi kain fa'i iha arguidu nia kabun no ko'alia ba arguidu nusá mak ita halo hanesan ne'e ba hau no kontinua fila ba uma, to'o uma lezada fó hatene ba nia aman ne'ebé mós hanesan testemuña (CdS) kona-ba arguidu nia hahalok refere, hafoin lezada ho nia aman ba arguidu nia uma no sira diskute malu, arguidu foti au baku dala ida iha lezada nia hasan no baku dala rua iha lezada nia ain rejulta kanek no ran.

Prokuradór akuza arguidu komete konkursu krime hanesan kontra artigu 171 KP kona-ba koasaun seksuál ho moldura penál tinan 2 to'o tinan 8 no artigu 145 KP kona-ba ofensa ba integridade fizika simples ho moldura penál to'o tinan tolu ka multa.

Produsaun ba prova sira

Iha prosesu julgamentu, arguidu nega faktu kona-ba koasaun seksuál maibé tanba lezada tolok arguidu ne'e mak arguidu nerbozu foti au baku dala tolu iha ain parte loos no liman parte loos. Arrepnde ninia hahalok foin primeiravés mai hatan iha tribunál.

Alende ne'e, lezada kontinua konfirma motivasaun problema no faktu hotu iha akuzasaun sein rezerva.

Testemuña SJA nu'udar viziñu depoimentu katak testemuña rona lezada hakilar nune'e testemuña halai ba haree lezada no testemuña haree lezada nia hasan hetan ran maibé lezada la konta buat ruma ba testemuña.

Alegasaun finál

Prokuradór konsidera arguidu nia hahalok ne'e provadu tuir faktu sira hotu iha akuzasaun mezmú produsaun prova arguidu konfesa parsial maibe lezada konfirma

faktu sein rezerva kona-ba koasaun seksual no ofensa integridade fizika simple. Tanba ne'e husu ba tribunal kondena arguidu ba pena efetiva tinan tolu fulan neen.

Entretantu defeza intende katak durante iha produsaun ba prova arguidu konfesa faktu ne'ebe kontitui ba krime, kolaborasaun di'ak ho tribunal, arrepende ona ba nia hahalok, foin primeiravés mai hatan iha tribunál. Tanba ne'e, husu ba tribunál atu aplika pena suspensaun ba arguidu.

Desizaun

Depoisde avalia faktu hotu, tribunál prova arguidu rasta iha lezada nia fuuk husi kotuk arguidu hakuak no kaer lezada nia hirus matan parte rua no iha arguidu nia uma mosu diskusaun arguidu baku dala ida kona iha lezada nia hasan no baku tan dala rua iha lezada nia ain rezulta kanek no ran. Bazeia ba faktu provadu sira ne'e no tetu mós sirkunstánsia atenuante sira hanesan arguidu konfesa, arrepende ninia hahalok, foin primeiravés mai hatan iha tribunál. Nune'e tribunál konklui prosesu ne'e no kondena arguidu ho pena úniku tinan tolu suspende ba tinan tolu.

10. Krime aktu seksuál adozxente

Nú. Prosesu : 0009/20.BCEVN
Kompozisaun Tribunál : Koletivu
Juis : Dra. Sribuana da Costa
Prokuradór : Dr. Julio da Silva Correia
Defeza : Dr. Sidonio Maria Sarmiento
Desizaun : Pena prizaun tinan 3 suspende ba tina 3

Iha 17 Junu 2022, Tribunál Distrital Baukua prezide julgamentu leitura sentensa ba krime aktu seksuál ho adolxente ne'ebé envolve arguidu MSS hasoru lezada ZAF (idade tinan 15), iha Munisípiu Baukau.

Akuzasaun Prokuradór

Prokuradór akuza katak iha 30 Janeiru 2022 iha oras tuku 11:00 arguidu bosok lezada dehan fó osan US\$40.00 hodi namora nune'e sira halo relasaun seksuál. Bainhira halo tiha relasaun seksuál arguidu la fó osan ba lezada. Arguidu halo relasaun seksuál dala rua ho lezada, arguidu nia aktu ne'e halo lezada gravida to'o labarik moris no oan mane oan ida.

Prokuradora akuza arguidu kontra artigu 178 KP kona-ba aktu seksuál ho adolxente ho moldura penál to'o tinan 5

Produsaun ba prova sira

Iha prosesu julgamentu, arguidu deklar katak sira nu'udar viziñu no lezada nu'udar arguidu nia bin nia oan, antes ne'e sira iha relasaun namoradu ne'e mak konsientemente halo relasaun seksuál hamutuk dala tolu, primeiru no sigundu halo relasaun seksuál iha lezada nia uma no halo relasaun seksual ba dala tolu halo besik iha bee matan. Ikus lezada gravida no arguidu hakarak responsavel maibé lezada nia

família mak la simu. Durante sira namora ne'e arguidu sempre fó osan US\$5.00, US\$10.00.

Alende ne'e, lezada deklara katak arguidu mak dehan halo relasaun seksuál hotu mak fó osan US\$40.00 maibé arguidu la fó osan, halo relasaun seksuál hamutuk dala rua, primeru halo relsaun seksual iha lezada nia dapur no sigundu iha au hun besik be matan. Lezada gravida no labarik moris ona-mane ida.

Alegasaun finál

Prokuradór haktuir katak bazeia ba produsaun ba prova arguidu uza ninia matoridade uza meus komonika ho lezada habosok osan hodi halo relsaun seksual, arguidu nia aktu ne'e priense krime ne'ebe imputa ba nia. Tanba ne'e husu ba tribunal atu kondena arguidu ba pena efetiva tinan rua iha prizaun

Defeza akresenta tan katak relasaun seksuál ne'e ho konsientemente apenas iha relasaun seksuál ne'e arguidu promete hela de'it maibé la tanba fó osan ne'e mak ikus sai problema. Arguidu mós pruntu responsabilidade ba labarik ne'ebé agora iha lezada. Tanba ne'e husu ba tribunal atu aplika pena suspensaun ba arguidu.

Desizaun

Depoisde avalia faktu hotu, tribunál prova arguidu arguidu bosok lezada dehan fo osan US\$40.00 hodi namora nune'e halo relasaun seksuál. Bainhira halo tiha relasaun seksuál arguidu la fó osan ba lezada. Arguidu halo relasaun seksuál dala rua ho lezada, arguidu nia aktu ne'e lezada gravida to'o labarik moris mane oan ida.

Bazeia ba faktu provadu sira ne'e no tetu mós sirkunstánsia atenuante sira hanesan arguidu konfesa, arrepende ninia hahalok, foin primeiravés mai hatan iha tribunál no di'ak malu ona ho lezada, nune'e tribunál konklui prosesu ne'e no kondena arguidu ho pena prizaun tinan tolu suspende ba tinan tolu.

11. Krime ofensa ba integridade fizika simples

Númeru prosesu	: 0017/22. BCBCV
Kompozisaun tribunál	: Singulár
Juís	: Dra. Florencia Freitas
Prokuradór	: Dr. Bartolomeu de Araújo
Defeza	: Dr. Cristovão Nuno Freitas (advogado ECM)
Desizaun	: Omologa dezistencia keisa

Iha 17 Juñu 2022, Tribunál Distritál Baukau prezide julgamentu tentativa konsiliaun no omologa ba krime ofensa ba integridade física simples ne'ebé envolve arguidu Domingos Boavida hasoru lezada Cecilia Vital Freitas, iha aldeia Gari-Uai suku Gari-Uia Postu Administrativu Baukau Vila Munispiu Baukau.

Akuzasaun prokuradór

Prokuradór akuza katak iha kinta feira 27 Janeiro 2022 iha oras tuku 11:00 iha área eskola EBC Gari-Uai, iha tempu ne'ebá lezada nu'udar profesora no arguidu mós nu'udar profesor mosu diskute malu no hamosu desintedementu, arguidu nerbosu lori bee agua tango ki'ik tuda kona iha lezada nia ulun, hirus matan no liman.

Prokuradór akuza arguidu kontra artigu 145 KP kona-ba ofensa ba integridade fizika simples ho moldura penál to'o tinan 3 ka multa.

Prosesu tentativa konsiliaun

Baziea ba artigu 262 KPP antes tama ba iha produsaun ba prova tribunál halo tentativa ba konsiliaun ba krime sira ho natureza semi-públiku. Iha prosesu tentativa ba konsiliaun ne'e lezada hakarak deziste ninia keixa hasoru arguidu tanba arguidu ho lezada mesak família no sira knua ida de'it. Perante tribunál arguidu husu deskulpa ba lezada no arguidu prometesei husu deskulpa ba lezada perante professor/a sira iha EBC Gari-Uia no promete sei la halo tan hahalok ne'e iha futuro. Lezada konkorda perdua arguidu no hakarak deiste nia keixa hasoru arguidu.

Alegasaun final

Prokuradór haktuir katak iha tentativa konsiliaun ne'e lezada perdua ona arguidu tanba husu ona deskulpa perante tribunál no iha sira nia eskola, lezada dezite tiha nia keixa hasoru arguidu perante tribunal. Nune'e husu ba tribunál omologa dezistensia keixa refere.

Entretantu, defeza haktuir katak perante tribunal arguidu arrepende ba nian hahalok no husu ona deskulpa ba lezada nu'udar familia. Nune'e husu ba tribunál omologa dezistensia keixa no absolve arguidu husi prosesu.

Desizaun

Depoizde tentative konsilian tuir artigu 261 KPP lezada deziste ona nia keisa hasoru arguidu ho kondisaun hanesan husu deskulpa. Nune'e tribunál hasai ninia despaixu hodi omologa dezistensia keixa no absolve arguidu husi prosesu.

12. Krime ofensa ba integridade fizika simples ho natureza violénsia doméstika

Nú. Prosesu	: 0124/21.BCBCV
Kompozisaun Tribunál	: Singular
Juis	: Dra. Florencia Freitas
Prokuradór	: Dr. Bartolomeu de Araújo
Defeza	: Dr. Grigório Maria Lourdes de Lima
Desizaun	: Pena multa

Iha 24 Juñu 2022, Tribunál Distritál Baukau prezide julgamentu leitura sentensa ba kazu ofensa integridade fizika simples ho natureza violénsia doméstika ne'ebé envolve arguidu JdS hasoru nia feen, iha Munisípiu Baukau

Akuzasaun Prokuradór

Prokuradór akuza katak iha 25 novembru 2021 iha oras tuku 17:00 lokraik arguidu haruka lezada ba fó han fahi lezada ba fo han tia arguidu haruka tan lezada ba hatama manu oan ba luhan lezada hatama tiha, arguidu haruka tan lezada ba halo modo no lezada hatan dehan hau haris lai mak halo modo, rona lezada nia resposta ida ne'e arguido nerbozu tuku kedas dala haat iha lezada nia hirus.

Prokuradór akuza arguidu kontra artigu 145 KP kona-ba ofensa ba integridade física simples ho nia moldura penál to'o tinan 3 ka multa konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu deklara katak faktu ne'ebé imputa ba nia loos hotu arguidu deklara katak los duni nia nia tuku dala haat iha hirus matan, arrepende ona ninia hahalok ba futuro sei la repete, diak malu ona, foin primeiravés mai hatan iha tribunál, depoisde akontese liu semana ida família rua tuur hamutuk resolve ona tuir kultura no arguidu husu ona deskulpa ba lezada.

Iha parte seluk, lezada kontinua konfirma faktu hotu iha akuzasaun no deklara katak depoisde akontesimentu liu semana di'ak malu fali perante família rua no to'o agora arguidu la baku ona lezada.

Alegasaun finál

Prokuradór haktuir katak arguidu provadu komete krime hasoru lezada bazeia ba arguidu nia konviksaun no konfirmasaun lezada nian ho arguidu nia aktu prinse artigu 145 KP kona-ba ofensa ba integridade física simples no lei Nü.7/2010 LKVD, mezmu sira di'ak malu ona, husu atu fó pena ne'ebé bele prevene arguidu ninia hahalok iha futuro no eduka mós komidade ne'ebé besik arguidu. Ho konsiderasaun sira ne'e hotu, husu ba tribunál atu aplika pena prizaun fulan ida suspende ba tinan ida.

Enkuantu defeza haktuir katak bazeia ba produsaun prova sira ne'ebé produs iha audénsia julgemntu henesan di'ak malu ona, depoisde akontese la baku ona lezada no sira hamutuk serbisu hodi sustenta sira nia família, ho razaun hirak ne'e husu ba tribunál fó pena justu no adekaudu ba arguidu.

Desizaun

Depoisde avalia faktu hotu, tribunál prova arguidu tuku iha lezada nia hirus matan dala haat depois arguidu dada sai lezada husi uma laran ba to'o liur. Bazeia ba faktu provadu sira ne'e no tetu mós sirkunstánsia atenuante sira hanesan arguidu konfesa, arrepende ninia hahalok, foin primeiravés mai hatan iha tribunál no di'ak malu ona ho lezada, nune'e tribunál konklui prosesu ne'e no kondena arguidu ho pena multa US\$45.00 ne'ebé arguidu sei selu sentavus 0,50 kada loraun durante loraun 90. Tribunál mós fiksa pena alternativa durante loraun 60 prizaun, bainhira arguidu la kumpri pena multa refere.

13. Krime ofensa ba integridade física nelijente no kondusaun sein karta

Nú. Prosesu : 0029/22. BCSTR
Kompozisaun Tribunál : Singulár
Juis : Dra. Florencia Freitas
Prokuradór : Dr. Bartolomeu de Araújo
Defeza : Dr. Grigório Maria Lourdes de Lima
Desizaun : Omologa dezistencia keisa no pena multa

Iha 24 Juñu 2022, Tribunál Distritál Baukau prezide julgamentu leitura sentensa ba krime ofensa ba integridade física simples no kondusaun sein karta ne'ebé envolve arguidu Januario Soares Pinto hasoru lezada Nelia Freitas da Costa Aparicio no Estadu RDTL, iha estrada publiku Vila Nova suku Tirilolo postu administrativu Baukau vila Munisípiu Baukau.

Akuzasaun Prokuradór

Prokuradór akuza katak iha Kinta feira 10 Marsu 2022 iha oras tuku 10:00 lezada iha eskola Publiku Nu.3 Vila Nova nia oin. Bainhira lezada atraves husi sorin atu ba Estrada sorin arguidu kondus motorizada ho marka Jupiter MX xapa matrikula G.2399 ho velocidade husi direisaun loja *Pelangi* mai soke kedas lezada. Arguidu nia hahalok ne'e rezulta lezada nia ain parte karuk tohar, no arguidu seidak iha abilidade hodi bele kondus iha dalan públiku.

Prokuradór akuza arguidu kontra artigu 148 (2) KP kona-ba ofensa ba integridade física negligente ho nia moldura penál to'o tinan 3 ka multa no artigu 207 KP kona-ba kondusaun sein karta ho nia moldura penál to'o tinan 2 ka multa.

Tentativa konsiliaun

Antes tama ba produsaun ba prova sira, bazeia ba artigu 262 KPP kona-ba tentativa konsiliaun, tribunál halo tentativa konsiliaun ba arguidu ho lezada relasiona ho krime ofensa ba integridade física negligente hasoru lezada tanba kazu ne'e klasifika nu'udar krime semi-públiku no nia prosedimentu depende ba keixa.

Iha prosesu konsiliaun ne'e, lezada hakarak deziste nia keixa hasoru arguidu tanba depoisde akontese arguidu responsabilidade ona ai moruk tradisional hodi kura lezada nia ain tohar. Bazeia ba konkordansia husi parte rua ne'e, tribunál omologa tiha keixa ne'e. Entretantu ba krime kondusaun sein karta, tribunál kontinua ba prosesu julgamentu.

Produsaun ba prova sira

Iha prosesu julgamentu, arguidu konfesa faktu hotu iha akuzasaun, arguidu kondus motor iha tinan 2017 no depoisde akontese arguidu trata ona nia karta kondusaun no agora dadauk iha karta kondusaun, arrepende ba nia hahalok, foin primeiravés mai hatan iha tribunál, servisu nu'udar iha ofisina loron ida bele hetan osan US\$7.00 mai kraik.

Alegasaun finál

Prokuradór haktuir katak iha audiénsia julgamentu arguidu konfesa faktu sira ne'ebe imputa ba nia maibe depoisde akontese arguidu ba trata ona nia karta kondusaun. nune'e husu ba tribunál atu kondena arguidu ho pena multa US\$50.00 ba arguidu

Enkuantu defeza haktuir katak bazeia ba produsaun prova sira ne'ebé produs iha audénsia julgamentu henesan, arguidu konfesa, arrepende ba ninia hahalok, depoisde akontese ba trata keda karta kondusaun ho razaun hirak ne'e husu ba tribunál aplika pena mais adekaudau ba arguidu.

Desizaun

Depoisde avalia faktu hotu, tribunál prova arguidu arguidu kondus motorizada ho marka Jupiter MX xapa matrikula G.2399 la iha karta kondusaun. Bazeia ba faktu provadu sira ne'e no tetu mós sirkunstánsia atenuante sira hanesan arguidu konfesa, arrepende ninia hahalok, foin primeiravés mai hatan iha tribunál no di'ak malu ona ho lezada, nune'e tribunál konklui prosesu ne'e no kondena arguidu ho pena multa US\$45.00 ne'ebé arguidu sei selu sentavus 0,50 kada loron durante loron 90. Tribunál mós fiksa pena alternativa durante loron 60 prizaun, bainhira arguidu la kumpri pena multa refere.

14. Krime omisidu agravadu no armas brankas

Nú. Prosesu : 0085/2.LASIC
Kompozisaun Tribunál : Koletivu
Juis : Dra. sribuana da Costa, Dr. José António d. Escurial no
Dra.Jumiaty Maria Freitas
Prokuradór : Dr. Bartolomeu de Araújo
Defeza : Grigório Maria Lourdes de Lima
Desizaun : Pena únika tinan 18 prizaun

Iha 24 Juñu 2022, Tribunál Distritál Baukau prezide julgamentu leitura akordaun ba krime omesidu simples no armas brankas ne'ebé envolve arguidu Amancio Fernandes hasoru lezada Matilde Fernandes, iha Munisípiu Lautein.

Akuzasaun Prokuradór

Prokuradór akuza katak iha 10 Dezembru 2021 iha oras tuku 10:30 Bairro Larinica aldeia Paihira suku Kakaven postu administrativu Lospalos munisípiu Lautein arguidu atu ba to'os lori katana liu husi lezada nia uma oin hodi husu ba lezada atu bolu nia la'en Adão Pereira maibé lezada lakohi hodi hatan katak hau la la'o hamutuk ho Adão, liafuan ida ne'e halo arguidu nervozu direktamente taa dala barak kona iha lezada nia liman parte loos, ulun parte loos, kabas parte kotuk no kotuk laran.

Prokuradór akuza arguidu kontra artigu 139 KP kona-ba omísidiu agravadu ho nia moldura penál tinan 12 to'o tinan 25 konjuga ho artigu 20 (1) husi lei arma brankas.

Produsaun ba prova sira

Iha prosesu julgamentu, arguidu deklara faktu akuza ba nia loos hotu no loos duni nia mak taa lezada, arguidu deklara tan katak momentu ne'eba nia liu husi duni lezada nia uma oin no husu nia lezada laen Adão maibe lezada hatan fali dehan la la'o ho Adão

ho ida ne'e mak halo arguidu nerbozu hodi taa lezada tanba arguidu husu ne'e atu tuur hamutuk para rezolve tiha problema tanba antes ne'e sira dun arguidu mak na'ok ai, ho ida ne'e mak arguidu atu ba bolu lezada nia la'en hodi rezolve maibe lezada hatan fali la la'o hamutuk ne'e mak halo arguidu nervozu hodi taa lezada hanesan iha akuzasaun arrepnde ninia hahalok, foin primeiraves mai hatan iha tribunál.

Alegasaun finál

Prokuradór haktuir katak arguidu akuzadu ba krime omesidiu agravadu tamba tuir loloos katana uza hodi halo servisu agrikultor no domestika maibe arguidu uza hodi ba oho fali lezada, motivu tamba lezada hatan de'it dehan nia la la'o ho Adão, derepente arguidu taa lezada to'o mate. Tanba ne'e husu ba tribunál atu kondena arguidu ho pena prizaun tinan rua nulu.

Defeza akresenta katak arguidu konfesa ba faktu hotu, loos arguidu nia mak taa lezada, antes ne'e iha primeiru interrogatoriu mós parte defeza akompana nafatin to'o julgamentu arguidu nafatin mantein ho nia liafuan, arguidu konfesa ba faktu hotu no arrepnde ho nia hahalok katak hahalok ne'ebé nia halo ne'e sala, foin primeiraves mai hatan iha tribunál. Tanba ne'e husu ba tribunál atu fo pena ne'ebé maiz adekuadu ba arguidu.

Desizaun

Depoisde avalia faktu hotu, tribunál prova arguidu uza duni katan hodi ta'a dala barak kona iha liman parte los, ulun parte loos, kabas parte kotuk no kotuk laran, konsekuensia husi arguido nia asaun provoka vitima nia liman parte los kotu, ulun parte los los kanek nakles boot, kabas kotuk nakles bot no kotuk laran kanek no nakles bot halo vítima ran sai barak no mate fatin. Bazeia ba faktu provadu sira ne'e no tetu mós sirkunstánsia atenuante sira hanesan arguidu konfesa, arrepnde ninia hahalok, foin primeiraves mai hatan iha tribunál. Nune'e tribunál konklui prosesu ne'e no kondena arguidu ho pena unika tinan sanulu resin ualu prizaun

15. Krime ofensa ba integridade fisika simples ho natureza violénsia doméstika

Nú. Prosesu : 0015/21.MNLLB
Kompozisaun Tribunál : Singular
Juis : Dra. Sribuana da Costa
Prokuradór : Dr. João Marques
Defeza : Dr. Sidonio Maria Sarmiento
Desizaun : Pena prizaun fulan 2 suspende ba tinan 1

Iha 27 Juñu 2022, Tribunál Distritál Baukau prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu AdCR hasoru nia feen, iha Munisípiu Manatuto.

Akuzasaun Prokuradór

Prokuradór akuza katak iha 21 Agosto 2020 iha oras tuku 08:00 dader arguidu lori fatuk tuku dala ida iha lezada nia ulun no tata iha lezada nia liman parte loos, motivu akontese tamba arguidu deskonfia lezada amante ho mane seluk.

Prokuradór akuza arguidu kontra artigu 145 KP kona-ba ofensa ba integridade fízika simples ho nia moldura penál to'o tinan 3 ka multa konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu deklara katak mosu diskusaun kona ba lezada sai husi uma dala rua maibe la informa ba arguidu ne'e mak arguidu nerbozu foti fatuk tuku dala ida iha lezada nia ulun no tata nia liman, depoisde akontese to'o agora sidauk di'ak malu, arrepende ba ninia hahalok no foin primeiravés mai hatan iha tribunál arguidu serbisu nu'udar agrikultór rezultadu hodi sustenta de'it familia.

Alende ne'e, lezada mós deklara katak momentu ne'eba lezada atu ba sosa modo mak arguidu la autoriza nune'e lezada kontinua ba, ne'e mak halo arguidu nerbozu baku lezada no agora daduk sira moris separada ona lezada rasik deside lakoi moris hamutuk ona ho arguidu.

Alegasaun finál

Prokuradór Prokuradór haktuir katak arguidu provadu komete krime hasoru lezada no arguidu ninia agresaun ne'e preense rekezitu sira husi artigu 145 KP, nune'e mezmua sira di'ak malu malu maibé nafatin halo prevensaun atu arguidu la repete ninia hahalok hasoru kualker membru familia no ema seluk iha futuro. Nune'e husu ba tribunál atu kondena ho pena prizaun fulan tolu suspende ba tinan ida.

Entretantu, defeza haktuir katak arguidu konfesa faktu ne'ebé nia komete hasoru lezada hanesan iha akuzasaun, arrepende ninia hahalok no foin primeiravés mai hatan iha tribunál. Tanba ne'e husu ba tribunál aplika pena maiz adekaudu ba arguidu.

Desizaun

Depoisde avalia faktu hotu, tribunál prova arguidu lori fatuk tuku dala ida iha lezada nia ulun no tata iha lezada nia liman parte loos. Bazeia ba faktu provadu sira ne'e no tetu mós sirkunstánsia atenuante sira hanesan arguidu konfesa, arrepende ninia hahalok, foin primeiravés mai hatan iha tribunál, nune'e tribunál konklui prosesu ne'e no kondena arguidu ho pena prizaun fulan rua suspende ba tinan ida.

16. Krime abuzu seksuál ba menór ho agravasaun

Nú. Prosesu	: 0087/19.BCSIC
Kompozisaun Tribunál	: Koletivu
Juis	: Dr. José António d. Escurial, Dra.Sribuana da no Costa, Dra.Jumiaty Maria Freitas
Prokuradór	: Dr.Julio da Silva Correia
Defeza	: Dr. Lino Lopes (advogadu ECM)

Desizaun : Pena prizaun tinan 15.

Iha 27 Juñu 2022, Tribunál Distritál Baukau prezide julgamentu leitura akordaun ba krime abuzu seksual ba menor ho agrvasau ne'ebé envolve arguidu AC hasoru lezada menor ho idade tinan 9, iha Munisípiu Baukau

Akuzasaun Prokuradór

Prokuradór akuza katak iha tinan 2016 loron no fulan la lembra arguidu komesa hahu pratika relasaun seksual kompletu ho lezada hamutuk dala hitu iha ai-kafe laran,

iha tinan 2017 loron no fulan ne'ebe la lembra arguidu kontinua pratika nafatin nia aktu hodi halo relasaun seksual ho lezada hamutuk dala haat.

Iha tinan 2018 no 2019 ho frekuensia hanesan arguidu halo relasaun seksual ho lezada hamutuk dala haat.

Arguidu nia asaun hodi halo relasaun ho lezada ne'e sempre ho maneira ameasa no dala ruma fó osan, ultima iha kuarta feira loron-04-fulan Marsu tinan 2020 haleu tuku 12:00 miudia arguidu lori lezada ba halo tan relasaun seksuál iha ai-kafé laran. Lezada ba tratamentu iha Pradet Baukau.

Konstitui arguido Antonio Correia nu'udar auto materiál ho forma kosumadu ba krime rua nulu (20) husi abuzu seksuál ba menór, ho agravasaun ne'ebé previstu iha art 177º nº 1, 182º nº 1 al. a) hotu hotu husi kodigu penal

Produsaun ba prova sira

Iha prosesu julgamentu, arguidu deklara husi 2016 to'o 2018 ne'e la loos, lezada mak inventa deit, arguidu deklara iha 24 Marsu mak sira halo relasaun seksuál liu semana ida halo tan relasaun seksuál iha fatin hanesan, iha ai-kafé laran, besik lezada nia uma. Arguidu deklara lezada mak tuituir de'it arguidu ba iha to'os ba faan SDSB no ba uma lezada sempre tuir hela de'it, sira mós hela viziñu, relasaun família arguidu nia rian nia oan lezada mós bolu hela de'it arguidu katak ba ai-kafé laran hodi halo relasaun seksuál, iha momentu halo relasaun seksuál ne'e lezada rasik hasai nia rupa. Antes ne'e arguidu fó hela de'it osan ba lezada maibé ba lezada.

Entretantu lezada deklara katak akontese primeiru lezada sei iha eskola primaria 4º ano momentu ne'eba lezada buka hela nia bin iha arguidu nia uma no derrepente arguidu save tia lezada iha nia kuartu laran hodi buti lezada hirus matan, kaer lezadania orgaun seksuál

Lezada deklara tan katak iha klasse 5º ano arguidu bolu nia ba iha ai kafé laran hodi halo relasaun seksuál, iha tinan 2019 bainhira lezada fila husi eskola arguidu bolu nia ba ai-kafé laran hodi hasai nia rupa hafoin relasaun seksuál lezada deklara taan katak iha tinan 2019 sira halo relasaun seksuál dala haat (4), lezada bai-bain husu osan ba arguidu no arguidu sempre fó osan sentavus 0,50 to'o US\$1.00 maibé arguidu dehan ba lezada hau simu hau nia osan idozu mak fó tan ba lezada ho montante US\$ 2.00

to'o US\$3.00 lezada deklarara akontese loloos dala haat momentu nia deklarara iha Ministeriu Públiku ne'e la loos tamba nia nervozu tamba arguidu sempre ameasa nia no ikus mai nia labele eskola to'o agora

Alegasaun finál

Prokurador akuzadu arguidu ba krime abuzu seksuál ba menóor, produasaun ba prova, arguidu konfesa parsialmente katak sira halo relasaun seksuál dala rua konfirma fali lezada nia deklarasaun katak sira halo relasaun seksuál dala haat, momentu sira halo relasaun seksuál lezada sei menoridade, konsekuensia husi arguidu nia hahalok halo lezada lakon nia virginidade no la bele kontinua eskola, aktu ne'ebé arguidu nia hahalok ne'e prenze duni krime abuzu seksuál ba menór ho nia agravaasaun tanba lezada sei ho idade menór, totál krime haat ho aktu relevu ida nune'e totál krime hamutuk lima, tanba ne'e prokuradór husu ba tribunál atu kondena arguidu ho pena prizaun tinan 25.

Defeza mós husu ba tribunál atu toma atensaun ba lezada nia deklarasaun tanba antes nia deklarara iha Ministériu Públiku katak sira halo relasaun seksuál dala 20 maibé iha prosesu julagaemntu lezada deklarara fali tan katak sira halo relasaun seksuál dala haat, parte defeza akresenta tan katak presija toma atensaun ba asuntu sira ne'e hotu, parte defeza entrega ba tribunál atu fó pena ne'ebé aplikavel ba arguidu.

Desizaun

Depoisde avalia faktu hotu, tribunál prova katak, 24 Marsu 2019 arguidu prátika relasaun seksuál ho lezada liu semana ida halo tan relasaun seksuál.

Faktu sira la provadu mak krime hitu akontese iha tinan 2016, krime haat akontese iha 2017 no krime haat ne'e akontese iha tinan 2018 no 2019 inklu aktu seksuál relevu. Bazeia ba faktu provadu sira ne'e no tetu mós sirkunstánsia atenuante sira hanesan, arrepende ninia hahalok, foin primeiravés mai hatan iha tribunál, nune'e tribunál konklui prosesu ne'e no kondena arguidu ho pena prizaun tinan sanulu resin lima

17. Krime ofensa ba integridade fisika simples ho natureza violénsia doméstika

Nú. Prosesu	: 0013/21.BCQLC
Kompozisaun Tribunál	: Singulár
Juis	: Dra. Sribuana da Costa
Prokuradór	: Dr. Ambrosio Rangel Freitas
Defeza	: Dr. Grigório Maria Lourdes de Lima
Desizaun	: Pena prizaun fulan 2 suspende ba tinan 1

Iha 27 Juñu 2022, Tribunál Distritál Baukau prezide julgamentu leitura sentensa ba kazu ofensa integridade fizika simples ho natureza violénsia doméstika ne'ebé envolve arguidu CF hasoru nia feen, iha Munisípiu Baukau.

Akuzasaun Prokuradór

Prokuradór akuza katak iha 02 Junu 2021 iha oras tuku 21:00 kalan arguidu tebe dala rua iha lezada nia kidan parte karuk, tebe dala rua iha kotuk laran, tuku dala rua iha kabas parte loos no buti iha kakorok halo lezada nia kakorok mean rasta lezada nia fuuk bobar iha nia liman halo lezada monu rejulta lezada nia liman sikun kona rai hetan kanek, arguidu kontinua dada lezada ba rai rezulta ain tur kanek, motive husi problema ne'e tamba lezada lakoi kous sira nia oan.

Prokuradór akuza arguidu kontra artigu 145 KP kona-ba ofensa ba integridade física simples ho nia moldura penál to'o tinan 3 ka multa konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu deklara katak loos duni nia tebe lezada nia kidan parte karuk no tebe iha kotuk laran, tuku iha kabas parte loos, maibe arguidu la buti lezada nia kakorok no la rasta lezada nia fuuk, motivu husi problema ne'e tamba arguidu haruka lezada atu kous sira nia oan para arguidu tein fahi etu maibe lezada lakohi no koalia barak ho nune'e halo arguidu nerbozu hodi tebe no tuku lezada, arguidu mós deklara katak durante sira moris hamutuk foin primeiravés arguidu baku lezada, di'ak malu ona, arrepende ba nia hahalok.

Alende ne'e, lezada mós kontinua konfirma faktu hotu iha akuzasaun no deklara katak depoisde akontesimentu ne'e, família rua tuur hamutuk hodi rezolve problema ne'e tuir kultura no to'o agora arguidu la baku ona lezada.

Alegasaun finál

Prokuradór haktuir katak arguidu provadu komete krime hasoru lezada no arguidu ninia agresaun ne'e priense rekezitu sira husi artigu 145 KP, nune'e mezmú sira di'ak malu malu ona, maibé nafatin halo prevensaun atu arguidu la repete ninia hahalok hasoru kualkér membru família no ema seluk iha futuru. Tetu ba sirkunstánsia sira ne'e, husu ba tribunál atu kondena arguidu ho pena prizaun tinan ida suspende ba tinan ida.

Defeza mós akresenta tan katak iha produsaun prova arguidu konfesa faktu ne'ebe konstitui ba krime, depoisde akontese sira di'ak malu ona, arrepende ba ninia hahalok, foin primeiravés mai hatan iha tribunál. Tanba ne'e husu ba tribunal fo pena ne'ebe adekúadu ba argudu

Desizaun

Depoisde avalia faktu hotu, tribunál prova arguidu tebe dala rua iha lezada nia kidan parte karuk tebe dala rua iha kotuk laran tuku dala rua iha kabas parte loos no buti iha kakorok, rasta lezada nia fuuk bobar iha nia liman halo lezada monu liman sikun kona rai hetan kanek, arguidu kontinua dada lezada ba rai no halo lezada nia ain tuur hetan kanek. Bazeia ba faktu provadu sira ne'e no tetu mós sirkunstánsia atenuante sira hanesan arguidu konfesa, arrepende ninia hahalok, foin primeiravés mai hatan iha

tribunál no di'ak malu ona ho lezada, nune'e tribunál konklui prosesu ne'e no kondena arguidu ho pena prizaun fulan rua suspende ba tinan ida

18. Krime ofensa ba integridade fisika simples ho natureza violénsia doméstika

Nú. Prosesu : 0011/20.LALRO
Kompozisaun Tribunál : Singular
Juis : Dra. Florencia Freitas
Prokuradór : Dr. Bartolomeu de Araújo
Defeza : Dr. Grigório Maria Lourdes de Lima
Desizaun : Pena multa

Iha 27 Juñu 2022, Tribunál Distritál Baukau prezide julgamentu leitura sentensa ba kazu ofensa integridade fizika simples ho natureza violensia domestika ne'ebé envolve arguida DF hasoru nia la'en, iha Munisípiu Lautein.

Akuzasaun Prokuradór

Prokuradór akuza katak iha 26 Agostu 2022 iha oras tuku 12:00 meiodia arguida sama lezadu nia ain rakut lezadu nia oin no isin no tata lezadu nia liman no ran sai. Antes ne'earguida husu atu lezadu kous sira nia oan maibé lezadu lakohi kous sira nia oan, arguida nerbosu halo agresaun refere hasoru lezadu.

Prokuradór akuza arguidu kontra artigu 145 KP kona-ba ofensa ba integridade física simples ho nia moldura penál to'o tinan 3 ka multa konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguida deklara katak momentu ne'e nia grávida hela labarik mós tanis, lezadu nahe kulusaun iha simente toba tiha lakohi kous labarik ne'e mak arguida sama lezadu nia ain ho intensaun fanu lezadu atu kous labarik maibé lezadu hadeer tuku fali arguida ne'e mak arguida kamat lezadu nia oin no isin sira seluk no tata lezadu nia liman. Depoisde akontese sira di'ak malu ona, arrepende ninia hahalok to'o agora moris hamutuk nafatin nu'udar feen-la'en.

Entretantu lezadu deklara katak momentu ne'e lezadu halo viajen dook husi Baukau ba Luro nune'e lezadu sente kole no deskansa derepente arguida sama lezadu nia ain ne'e mak lezadu hirus tuku dala ida iha arguida nia matan fukun, arguida fila kamat lezadu nia oin no isin, tata lezadu nia liman hetan kanek no ran, diak malu ona no to'o agora moris hamutuk nafatin nu'udar feen-la'en.

Alegasaun finál

Prokuradór haktuir katak akuzasaun prosedente no provadu tanba hetan konfirmasaun husi arguida no lezadu, atu prevene arguida lezadu nia moris hamutuk iha futuru husu ba tribunál atu kondena arguida ho pena prizaun fulan ida suspende ba tinan ida.

Entretantu, defeza akresente katak arguida ho intesaun fanu lezadu la'os sama lezadu nia ain maibé lezadu tuku fali arguida ne'e mak arguida hirus halo agresaun hasoru

lezadu, arrepende ninia hahalok di'ak malu ho lezadu no arguida nu'udar serbisu iha uma (dona de casa) tanba ne'e husu ba tribunál aplika pena mais adekuadu ba arguidu.

Desizaun

Depoisde avalia faktu hotu, tribunál prova arguida sama lezadu nia ain rakut lezadu nia oin no isin no tata lezadu nia liman no ran sai. Bazeia ba faktu provadu sira ne'e no tetu mós sirkunstánsia atenuante sira hanesan arguida konfesa, arrepende ninia hahalok, foin primeiravés mai hatan iha tribunál no di'ak malu ona ho lezadu, nune'e tribunál konklui prosesu ne'e no kondena arguidu ho pena multa US\$30.00 ne'ebé arguidu sei selu sentavus 0,50 kada loron durante loron 60. Tribunál mós fiksa pena alternativa durante loron 40 prizaun, bainhira arguidu la kumpri pena multa refere.

19. Krime ofensa ba integridade fízika simples no danu simples

Nú. Prosesu : 0020/21. LALPL
Kompozisaun Tribunál : Singulár
Juis : Dra. Florencia Freitas
Prokuradóra : Dr. Bartolomeu de Araujo
Defeza : Sidonio Maria Sarmento
Desizaun : Kada arguidu kondena pena multa US\$30.00

Iha 27 Juñu 2022, Tribunál Distrital Baukau prezide julgamentu leitura sentensa ba krime ofensa ba integridade fízika simples no ameasa ne'ebé envolve arguidu Amancio Fernades Monteiro no Florindo da costa hasoru lezadu Patricio Pedro, iha suku Soru postu administrativu Laopalos Munisípiu Lautein.

Akuzasaun Prokuradóra

Prokuradóra akuza katak iha 13 Abril 2021 iha oras tuku 08:00 dadeer arguidu sira ba sobu hotu lezadu nia lutu ne'ebé nia halo hodi haleu to'os nune'e animal labele ba esraga lezadu nia to'os. Sira diskute malu no arguidu Florindo da costa tebe dala ida iha lezadu nia kabun no arguidu Amancio Fernades Monteiro sobu lutu.

Prokuradór akuza arguidu sira ko autoria kontra artigu 145 KP kona-ba ofensa ba integridade fízika simples ho nia moldura penál to'o tinan 3 ka multa no artigu 258 KP kona-ba danu simples ho nia moldura penál to'o tinan 3 ka multa.

Produsaun ba prova sira

Iha prosesu julgamentu, arguidu Amancio Fernades Monteiro no Florindo da costa konfesa faktu hotu iha akuzasaun, hakarak di'ak malu maibé lezadu mak lakohi, arrepende sira nia hahalok no ba futuro sei la halo tan kualker haosru lezadu inklui ema seluk.

Tanba arguidu sira konfesa faktu nune'e tribunál presinde tiha lezadu.

Alegasaun finál

Prokuradór haktuir katak bazeia ba produsaun prova iha audénsia julgamentu prokuradór haktuir katak arguidu nain rua provadu komete krime ko autoria ba krime ofensa simples no danu simples. Tanba ne'e husu ba tribunal atu kondena arguidu sira ho pena multa loron 40 kada loron koresponde ho valór osan sentavus 0,50.

Entretantu, defeza haktuir katak arguidu sira konfesa faktu hotu iha akuzasaun, arrepende sira nia hahalok, hakarak di'ak malu ho lezadu maibé lezadu mak lakohi, arguidu sira koopera di'ak ho tribunál nune'e ladifikulta tribunál atu deskoberta verdade. Tanba ne'e husu ba tribunál aplika pena kmaan ba arguidu sira.

Desizaun

Depoisde avalia faktu hotu, tribunál prova arguidu Florindo da costa tebe dala ida iha Lezadu nia kabun no arguidu Amancio Fernandes Monteiro sobu lutu. Bazeia ba faktu provadu sira ne'e no tetu mós sirkunstánsia atenuante sira hanesan arguidu sira konfesa, arrepende sira nia hahalok, foin primeiravés mai hatan iha tribunál, nune'e tribunál konklui prosesu ne'e no kondena kada arguidu ho pena multa US\$30.00 ne'ebé kada arguidu sei selu sentavus 0,50 kada loron durante loron 60. Tribunál mós fiksa pena alternativa ba kada arguidu durante loron 40 prizaun, bainhira arguidu sira la kumpri pena multa refere.

20. Krime ofensa ba integridade física simples

Nú. Prosesu	: 0006/21. MNLAL
Kompozisaun Tribunál	: Singulár
Juis	: Dra. Sribuana da Costa
Prokuradóra	: Dr. Bartolomeu de Araújo
Defeza	: Dr. Grigório Maria Lourdes de Lima
Desizaun	: omologa no dezistencia keisa

Iha 27 Juñu 2022, Tribunál Distrital Baukau prezide julgamentu tentativa konsiliaun ba krime ofensa ba integridade física simples ne'ebé envolve arguidu Manuel da Costa Gusmão hasoru lezadu Gaspar Ganavaro Soares Viegas, iha aldeia Weboro suku Lifau postu administrativu Laleia Munisípiu Manatuto.

Akuzasaun Prokuradór

Prokurador akuza katak iha 09 Agostu 2021 iha ora stuku 13:00 lokraik iha aldeia Weboro suku Lifau postu administrativu Laleia Munisípiu Manatuto lezadu la'õ hamutuk ho nia kolega sira ba hili sukaer no lezadu kanta halimar ho jeitu oi-oin no iha momentu ne'e sira la'õ besik hela arguidu nia uma mak arguidu haree hetan nune'e arguidu ba hasoru lezadu hodi tuku kedas lezadu nia kanuruk dala rua. Motivun arguidu tuku lezadu tanba lezadu kanta halo jeitu hanesan soe piadas no tolok.

Prokuradór akuza arguidu kontra artigu 145 KP kona-ba krime ofensa ba integridade física simples ho moldura penal to'õ tinan 3 ka multa.

Produsaun ba prova sira Bazeia ba artigu 262 Kódigu Prosesu Penál (KPP) kona-ba tentativa ba konsiliaun, nune'e antes tama ba julgamentu produsaun ba prova, juis husu atu halo tentativa konsiliaun ba arguidu no lezadu. Iha prosesu tentativa konsiliaun ne'e, arguidu ho konsensia rasik husu deskulpa ba lezadu ho kondisaun osan US\$400.00 ba lezadu tanba sira mesak familia no uma tuur viziznus ho distansia mais menus 15 metru no arguidu mos promete sei la repete ninia hahalok ne'e iha futuru. Lezadu perante tribunal konkorda no hakarak deziste nia keixa hasoru arguidu.

Alegasaun final

Prokuradór haktuir katak iha tentativa konsiliaun ne'e lezadu perdua ona arguidu tanba husu ona deskulpa ho kondisaun kura kanek ho osan US\$400.00 nune'e lezada perante tribunál dezite nia keixa hasoru arguidu. Nune'e husu ba tribunál omologa dezistencia keixa refere.

Entretantu, defeza haktuir katak perante tribunál arguidu arrepende nian hahalok no husu ona deskulpa ba lezadu nu'udar familia. Nune'e husu ba tribunál omologa dezistencia keixa no absolve arguidu husi prosesu.

Desizaun

Depoizde tentativa konsiliaun tuir artigu 261 KPP lezada deziste ona nia keixa hasoru arguidu ho kondisaun hanesan husu deskulpa. Nune'e tribunál hasai ninia despaisu hodi omologa dezistencia keixa no absolve arguidu husi prosesu.

21. Krime ameasa

Nú. Prosesu	: 0007/22. MNMNT
Kompozisaun Tribunál	: Singulár
Juis	: Dra. Sribuana da Costa
Prokuradóra	: Dr. Bartolomeu de Araujo
Defeza	: Dr. Sidonio Maria Sarmiento
Desizaun	: omologa no dezistencia keisa

Iha 27 Juñu 2022, Tribunál Distritál Baukau prezide julgamentu tentativa konsiliaun ba krime ameasa ne'ebé envolve arguidu Romano Soares no Natalino Hornai Soares hasoru Mario de Deus Soares, iha aldeia Fatubela suku Aiteas postu administrativu Manatuto vila Munisípiu Manatuto.

Akuzasaun Prokuradór

Prokurador akuza katak iha 15 Fevreiru 2022 iha oras tuku 10:00 aldeia Fatubela suku Aiteas postu administrativu Manatuto vila, Munisípiu Manatuto arguidu sira ba impede katak lezadu labele halo ka halai natar tanba natar ne'e sira nia aman nian, lezadu hatan katak nia kontinua halo natar ne'e tanba lezadu sosa ona husi subriñu Agus Soares iha lora 10 Juñu 2021. Hafoin aguidu Romano ka'alia no ameasa lezadu dehan *'oho mate tiha ó mak uza ensada ke'e rai no hakohi tiha lezadu*. Arguidu nia

hahalok ne'e halo lezadu sente tauk wainhira ba halo natar no la libre movimentu hanesan antes sidauk problema.

Prokuradór akuza arguidu kontra artigu 157 KP kona-ba krime ameasa ho moldura penal to'o tinan 1 ka multa.

Produsaun ba prova sira Bazeia ba artigu 262 Kódigu Prosesu Penál (KPP) kona-ba tentativa ba konsiliaun, nune'e antes tama ba julgamentu produsaun ba prova, juis husu atu halo tentativa konsiliaun ba arguidu sira no lezadu. Iha prosesu tentativa konsiliaun ne'e, arguidu sira ho konsensia rasik husu deskulpa, tanba sira mesak família nune'e lezadu mós konkorda no hakarak deziste nia keixa hasoru arguidu sira.

Alegasaun finál

Prokuradór haktuir katak iha tentativa konsiliaun ne'e lezadu perdua ona arguidu sira tanba mesak familia tiun ho subrinu, nune'e lezadu dezite tiha nia kexsa hasoru arguidu sira perante tribunál. Nune'e husu ba tribunál omologa dezistensia keisa refere.

Entretantu, defeza haktuir katak perante tribunál arguidu arrepende nian hahalok no husu ona deskulpa ba lezadu nu'udar família. Nune'e husu ba tribunál omologa dezistensia keisa no absolve arguidu husi prosesu.

Desizaun

Depoizde tentative konsiliaun tuir artigu 261 KPP lezada deziste ona nia keisa hasoru arguidu ho kondisaun hanesan husu deskulpa. nune'e tribunál hasai ninia despaisu hodi omologa dezistensia keisa no absolve arguidu husi prosesu.

22. Krime ofensa ba integridade física simples ho natureza violénsia doméstika

Nú. Prosesu : 0001/22. BCLGA
Kompozisaun Tribunál : Singulár
Juis : Dra. Sribuana da Costa
Prokuradór : Dr. Julio da silva Correia
Defeza : Dr. Grigório Maria Lourdes de Lima
Desizaun : Pena prizaun fulan 3 suspende ba tinan 1

Iha 28 Juñu 2022, Tribunál Distritál Baukau prezide julgamentu leitura sentensa ba krime ofensa ba integridade física simples ho natureza violénsia doméstika ne'ebé envolve arguidu AdSG hasoru nia feen sigundu, iha Munisípiu Baukau.

Akuzasaun Prokuradór

Prokuradór akuza katak arguidu iha feen hamutuk nain tolu no lezada nu'udar feen sigundu no arguidu mos iha antesidente krimenais Nú.prosesu 0029/21,BCLGA.

iha 17 Fevreiru 2022 iha oras tuku 06:00 dadeer lezada ba haris fatin soe beeki'ik derepente arguidu loke odamatan halo lezada hakfodak no sira diskute malu arguidu nerbozu basa dala ida iha lezada nia kabaas parte loos no basa dala ida iha kotuk laran

nune'e lezada mós nerbozu sobu tiha haris fatin hafoin arguidu dada lezada nia liman no liman parte loos kona kalen hetan kanek.

Prokuradór akuza arguidu kontra artigu 145 KP kona-ba ofensa ba integridade fízika simples ho nia moldura penál to'o tinan 3 ka multa konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu deklara katak arguido iha feen hamutuk nain tolu no momentu ne'e arguidu toba iha liur tanba nia atu ba mí no nia ba haris fatin loke odomate haree lezada iha laran no arguidu mós mí de'it onaiha haris fatin ninia didin loloon ne'ebé halo ho kalen. Arguidu la halo agresaun hasoru lezada maibé lezada mak nerbozu sobu tiha haris fatin.

Alende ne'e, lezada deklara katak momentu lezada tuur hela iha haris fatin laran derepente arguidu tama haris fatin laran hasa'e tiha hena taka haris fatin nia odamatan. Nune'e lezada hirus diskute malu ho arguidu no arguidu fila tuku dala ida iha kotuk laran no tuku dala ida iha kabas ne'e mak lezada hirus sobu tiha haris fatin no arguidu kaer lezada nia liman parte karuk dada sai mak lezada nia liman parte loos kona kalen hetan kanek. Arguidu iha feen primeiru hela ketak maibé lezada nu'udar feen sigundu hela hamutuk ho feen terseiru no arguidu hela ba mai de'it. Depois akontese ne'e lezada ho nia oan ba hela ho nia inan aman to'o agora no lezada mós diside hakarak moris separa ho arguidu.

Alegasaun finál

Prokuradór haktuir katak mezmú arguidu nega faktu maibé lezada konfirma faktu sira iha akuzasaun, arguidu iha antesidente krime ho Nú. Prosesu 0029/20. BCLGA ne'ebé kondena arguidu ho pena prizaun fulan neen suspende ba tinan ida, arguidu komete tan krime iha período suspensaun, arguidu la hatudu ninia arremendementu arguidu nia konduta sira lezada diside moris separa ho arguidu. Tanba ne'e husu ba tribunál bazeia ba artigu 73 KP atu revoga tiha suspensaun nune'e husu atu aplika pena efetiva fulan neen no kondena mós ba krime foun pena prizaun fulan neen.

Defeza akresenta katak arguidu tama duni haris fatin bahira lezada sei iha haris fatin, lezada hirus sobu kalen ne'ebe didin ba haris fatin ne'e mak arguidu hirus dada lezada nia liman hetan kanek, haree ba arguidu nia konfiksaun ne'e husu ba tribunal atu aplika pena ne'ebe maiz adekuadu ba arguidu.

Desizaun

Depoisde avalia faktu hotu, tribunál prova arguidu basa dala ida iha lezada nia kabaas parte loos no basa dala ida iha kotuk laran. Bazeia ba faktu provadu sira ne'e no tetu mós sirkunstánsia atenuante sira hanesan arguidu, arremende ninia hahalok, arguidu

iha antesidente krimenais, nune'e tribunál konklui prosesu ne'e no kondena arguidu ho pena prizaun fulan tolu suspende ba tinan ida.

Atu hetan informasaun kompleitu, favór kontaktu:

Ana Paula Marçal

Diretora Ezekutiva JSMP

Diresaun e-mail: ana@jsmp.tl

Telefone: (+670) 33238883 | 77040735

Website: <https://jsmp.tl>

info@jsmp.tl